

**Tasiilami eqqaanilu, Ittoqqortoormiini nannuttassat ukiunut tulliuuttunut nalilersoqqinnissaa aammalu inoqarfiup eqqaani inuillu najugaqarfiisa akornanni nannut pulasut inoqarfinnullu qallisimasut toqqaannaq toqunneqartalernissaannut, aammalu asimi piniariarfinnut inuit akornannut pisut toqunneqartalersinnaanissaat pillugit apeqquteqaat aallaavigalugu oqallisissiasatut siunnersuut**  
(Emanuel Nûko, Naleraq)

### **Akissuteqaat**

(Aalisarnermut Piniarnermullu Naalakkersuisoq)

### **Suliarineqarnera**

Naalakkersuisut siunnersuuteqartuq Emanuel Nûko, Naleraq, Tasiilami eqqaanilu, Ittoqqortoormiini nannuttassat ukiunut tulliuuttunut nalilersoqqinnissaa aammalu inoqarfiup eqqaani inuillu najugaqarfiisa akornanni nannut pulasut inoqarfinnullu qallisimasut toqqaannaq toqunneqartalernissaannut, aammalu asimi piniariarfinnut inuit akornannut pisut toqunneqartalersinnaanissaat pillugit apeqquteqaat aallaavigalugu oqallisissiasatut siunnersuut pillugu qujaffigaat.

Naalakkersuisut UKA 2021/060-imut akissuteqaammut innersuuteqarput.

Piniakkat killilersukkat pillugit Naalakkersuisut nuna tamakkerlugu suleriaaseq periutsillu assigiit tunngavigalugit aalajangiisarpoq. Tamanna pisarpoq inatsisit nalunaarutillu atuuttut attuumassuteqartullu tunngavigalugit, taakkualu nunap immikkoortuinut tamanut assigiimmik atuuttarput.

Piniarnek aallaaniarnerlu pillugit Inatsisartut inatsisaat nr. 12, 29. oktober 1999-imeersoq tassaavoq inatsisitigut pingaarnersaq, piniagassallu aqunneqarnerata nalunaarutaannullu tunngavik. Nalunaarut pineqartuq tassaavoq nannunik illersuineq piniarnerlu pillugit Namminersorlutik Oqartussat nalunaarutaat nr. 3, 14. september 2018-imeersoq.

Pisassiissutit aalajangersarneqarneranni nunat tamalaat akornanni isumaqatigiissutit, uumassusilinnik misissuisut inassuteqarnerat, atuisut ilisimasaat kiisalu Piniarnek pillugu Siunnersuisoqatigiit ilaasortaannut tusarniaasimaneq tunngavigineqarlutik. Naalakkersuisut aamma nunap inoqqaavisa pisinnaatitaaffii tunngavigisarpaat kiisalu kulturikkut kingornussatta tammatsaaliornissai.

Naalakkersuisut suleqatigiinnissamat isumaqatigiissutaanni piniarnek pillugu allaqqavoq atuneq piujuartitsineq tunngavigalu ingerlanneqassasoq, taamaalillunimi piniagassaqartuassamat, peqatigisaanillu piniarnermik inuussutissarsiuuteqarnerup ingerlaannarsinnaanera ataatsimut isigalugu isumannaarneqassamat. Naalakkersuisut tamanna isumaqatigiissummi immikkoortoq atortussanngortinnissaa kissaatigaat.

Kinguaariinnut tulliuuttussanut pisassatigut isumalluutit atorneqarnissaat attatiinnarsinnaajumallugu, uumasoqatigiit killilersukkat pillugit uumassusilerituunit inassuteqarnermik Naalakkersuisut nalinginnaasumik pissarsiniartarput. Inassuteqarnek uumasoqatigiinnut ataasiakkaanut atatillugu suliarineqartarpoq, uumasoqatigiillu qanoq amerlatiginerat,

uumasoqatigiinni ataasiakkaani uumassuseqarnikkut pissutsit, piniarnerup annertussusaa aamma sumiiffinni uumasut siumorneqarfigisinnaasaanni uumaniarnerannut atugassarititaasut apeqqutaatinneqassallutik. Piujuartitsineq tunngavigalugu piniarneq attassinnaajumallugu, inassuteqarnermi uumasooqatigiiaanik ataasiakkaanik piniarneq qanoq annertutigisooq ingerlanneqarsinnaanersoq nalilerneqartassaaq. Tassunga ilanngullugu aamma erseqqissaatigerusuppara aalajangiiniarnernut tunngatillugu piniartut ilisimasaasa katersornissaat atorneqarnissaallu pingaaruteqassusaa.

Nannunut atatillugu nannut pillugit kalaallit canadamiullu ataatsimoorussamik kommissioniata (JCPB) akornanni ataatsimoorussamik ilisimatuussutsikkut suleqatigiissitaq piujuartitsineq tunngavigalugu atuinissamut aqutsisunut siunnersuisartuuvoq. Kalaallit Nunaata kitaanut atatillugu JCPB aqutugalugu, kiisalu Tunumut atatillugu Pinngortitaleriffik aqutugalugu inassuteqarneq ingerlanneqartarpoq, Tunumi nanoqatigiit nunanik allanik avinneqarneq ajormata.

Kalallit Nunaanni Pinngortitaleriffik Tunumi nannunik misissuinerinik annertuunik ingerlataqarpoq, taakkunungalugu atatillugu qaammataasiaq iluaqutugalugu nalunaaqutsersuineq timmisartukkullu kisitsinerit 2022-mi 2023-milu ingerlanneqarnissaat naatsorsuutigineqarluni. Misissuinerit taaneqartut sioqqullugit Tunumi nannunik kisitsisoqarnikuunngilaq. Misissuinerit 2014-imiit 2021-mut ingerlanneqarnissaat pilersaarutaagaluarpoq, 2020-mili COVID-19-imik pissuteqartumik kisitsinerit ukiut marlunnik kinguaattoorallarput, taamaalillutillu 2023-mi naammassineqartussatut naatsorsuutigineqarlutik.

Taamaattumik Tunumi nannut pillugit uumasorsiuut inassuteqaataannik soqanngilaq. Taamaattumillu pisassiissutit mianersornermik tunngaveqartumik inissinneqartarlutik.

Naalakkersuisut isumaqarluinnarput malittarisassatigut iliuusissanut imm. UKA 2021/060-mi siunnersuutigineqartumi tunngasunik suliaqartoqartariaqartoq periusissat sinaakkuteqartin-niarlugit. Taamaattumik Naalakkersuisut suliamik aallartitsiniarput nannut toquttariaqakkat tamakkiisumik naatsorsuinerimi pisassiissutiniit ilanngaatigineqartalernissaat pillugu.

Naalakkersuisut taamatut oqaaseqarlutik angusaqarfiulluurtumik aamma oqallilluarnissamut qilanaarput.